

近代中國史料叢刊續編第五輯
沈雲龍主編

林文忠公日記

林則徐著

文海出版社有限公司印行

見光

見光

見光

十二月廿三日亥時晴早寒未凍

小車而行積雪初消沈浮殊甚年玉候紅

易好成刻玉橋頭宿

廿四日癸亥晴五鼓行原前河停候申刻入朝陽

門是前朝掖廟遠錦若之威峭是現在塔方院

觀音菴結寓

廿五日甲子晴早晨往拜百菊刻方母三辰

遂至鍾山書院相見批輕倚前華春秋

年日步履少年尚或不堪也借宿在入問

嘉慶十七年十二月二十三日至二十五日

(原件藏林紀彝先生處)

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



近代中國史料叢刊續編 第五輯

目 錄

林文忠公日記	林則徐著
達衷集	許地山編
英、法聯軍史料	謝興堯等著
辛亥以後十七年職官年表	劉壽林編
且頑老人七十歲自叙	李平書撰
韜園詩集	賈景德著
釧影樓回憶錄	包天笑著
長春詠	翁一鶴著
秣陵吟	翁一鶴著

目 錄

壬申（嘉慶十七年，公元一八一二年）十月二十五日至十二月二十九日	1
癸酉（嘉慶十八年，公元一八一三年）正月初一至十二月二十九日	7
丙子（嘉慶二十一年，公元一八一六年）正月初一日至十二月三十日	33
己卯（嘉慶二十四年，公元一八一九年）（即《滇輶紀程》）閏四月二十七日，五月初八日至八月初一日	69
壬午（道光二年，公元一八二二年）三月初一日至八月二十九日	82
癸未（道光三年，公元一八二三年，十月初一日至十一月初三日，十一月初八日至十二月三十日	107
甲申（道光四年，公元一八二四年）正月初一日至初四日	118
乙酉（道光五年，公元一八二五年）二月二十四日至三月十七日，四月初一日至五月三十日	119
甲午（道光十四年，公元一八三四年）正月初一日至十二月三十日	129
乙未（道光十五年，公元一八三五年）正月初一日至十二月三十日	169

- 丙申(道光十六年,公元一八三六年)十月初九日至十月十五日
 五日.....217
- 丁酉(道光十七年,公元一八三七年)正月初一日至初七日,
 二月初一日至十二月三十日.....224
- 戊戌(道光十八年,公元一八三八年)正月初一日至十二月三十日.....274
- 己亥(道光十九年,公元一八三九年)正月初一日至十二月二十九日.....326
- 庚子(道光二十年,公元一八四〇年)八月十五日至十二月三十日.....368
- 辛丑(道光二十一年,公元一八四一年)正月初一日至五月二十八日.....380
- 壬寅(道光二十二年,公元一八四二年)七月初一日至十二月二十八日.....406
- 乙巳(道光二十五年,公元一八四五年)正月初一日至二月初三日.....444

壬申日記

嘉慶十七年，公元一八一二年

十月

二十五日，甲子。陰。未刻至洪山橋登舟，酉刻開行，數步即泊。夜雨達旦。

二十六日，乙丑。早晨雨，巳刻晴。開行，微有南風，午後過竹崎關，晚泊白沙驛。

二十七日，丙寅。晴。早發，北風頂逆，午過閩清口，晚泊小箬。

二十八日，丁卯。晴。早發，未刻至水口，稍停，晤羅章述，晚至灣口泊。

二十九日，戊辰。晴。早發，未刻過黃田，晚近三都口泊。

三十日，己巳。晴。早發，晚過九里潭泊。

十一月

初一日，庚午。晴。早發，晚泊吉溪。

初二日，辛未。陰。早發，申刻至延平府城外泊。進城剃頭，晚回船。

初三日，壬申。陰。早發，辰刻過霧溪灘，晚泊高桐。

初四日，癸酉。晴。早發，晚泊南雅口。

初五日，甲戌。陰。早發，晚至建寧府城外泊。寫家書一封，託鹽館林道和年伯(係甲子副榜同年林準之父，住山兜尾三營，在此管總)寄省。

初六日，乙亥。晴。入建寧府城，拜林道和年伯，託寄家信，據

云，次日卽有回省差船。並在鹽館中晤鄭擊仲（森魯之子，在此出官），又赴府學陳汝采三兄處，俱會晤，並留午飯，未赴。林年伯送食物四件。未刻解纜，晚過阿彌陀佛灘泊。

初七日，丙子。晴。早發，未刻過葉坊，晚泊清洲。

初八日，丁丑。早發，過大米、小米、牛頭各灘，行甚滯，晚泊牛尾，僅行二十里。夜雨。

初九日，戊寅。陰。早發，巳刻過小湖，晚過七里灘泊。

初十日，己卯。早發，辰刻過水吉，稍停。是日遇雨，勉行二十餘里，申刻泊金墩。夜仍有微雨。

十一日，庚辰。密雨竟日，舟人旋行旋止，申刻過大羅灘，泊馬嵐。是日爲六妹于歸之辰，未審省中晴雨何如，爲之懸切。

十二日，辛巳。上半日陰，下半日雨。晚泊舊館。

十三日，壬午。晴。天氣始覺甚寒。巳刻開行，晚泊曹村。

十四日，癸未。晴。辰刻行，早飯過水北，晚泊觀前。此處離浦城四十里，向來冬水淺時，每由此舍舟就陸。此番初亦擬其如是，幸水吉以上，連日有雨，溪流復長，故仍令舟人泝流而前。

十五日，甲申。晴。辰刻行，水甚淺，舟人將其貨物另盤竹筏，本舟較覺輕便，狹淺之處，背負而行。晚過將軍灘，至更餘始泊。

十六日，乙酉。早發，巳刻到浦城，遇雨，卸舟移裝，寓黃協興行中，李君亦同寓。詢知此處人夫短缺，大差絡繹，有客商自省中來，先到半月，尙在此間等候者；勢旣如是，亦只可少住耳。

十七日，丙戌。晴。早晨邀人往鹽館借轎，薩肇文（在此出官）兄卽來寓相晤。上午往拜祖舫齋少寇、祝東岩太守（樑五兄親家，伊寄有物件，本地人，新捐知府），俱未晤。旋赴鹽館，肇文兄留晚飯，更餘始回。祝君來回候，亦未晤，並以柬見招翌日午飲。夜，鄭天雯來（渠在祝家幫辦城工學）。

十八日，丁亥。晴。早晨祝東岩來，晚後祖少寇來，俱晤譚。是

午赴東岩之席，在其所構二有堂別業，居城之東偏，亭榭竹木，粲然俱新。少寇亦同席，飲興甚高，二鼓始回寓。是夜爲冬至前一夕，憶家中搓丸，却少數人，倍有望雲之想；因亦於此間買朮爲丸，以祝團圓，且存榕城鄉俗。

十九日，戊子。晴。薩肇文兄及鹽館諸友先後來談。鄭北敦（高湖人，庚午，孝廉）自江蘇贛榆縣何觀承任中回里，過此相晤，並付來清江鄭大兄所寄一書。是午祖少寇亦在二有堂設席見招，赴之，二鼓回寓。數日來，浙省無夫到此，官差尙未疎通，催促行戶亦屬無益，不得不靜以待之，恐更有二三日耽擱，焦急殊甚。

二十日，己丑。晴。鄭北敦回省，託其寄家書一封。

二十一日，庚寅。晴。早晨祖少寇、祝東岩來。飯後始有人夫，束裝就陸，北風甚大，晚至漁梁宿。

二十二日，辛卯。晴。辰刻行，上午過五顯嶺，又過大竿嶺，入浙界，酉刻至念八都宿。

二十三日，壬辰。晴。辰刻行，午刻過仙霞嶺，謁關聖廟求籤，籤語云：“曩時敗北又圖南，筋力雖衰尙一堪。欲識生前君大數，前三三與後三三”。申刻至峽口宿。

二十四日，癸巳。晴。辰刻行，過蘇嶺，又過江郎街。天清，望見江郎山三片石；凡出行者，以得見此石爲吉兆。未刻至清湖，寓陳翰侯行中。

二十五日，甲午。晴。行中早飯後下鷓鴣船，船甚小，東北風頂逆，晚泊大雞灘，僅行三十餘里。

二十六日，乙未。晴。東北風大。辰刻行，晚泊坑西隅。

二十七日，丙申。晴。早發，辰刻至衢州府，移行李上江山船，午後開行，西南風得利，晚泊安仁。

二十八日，丁酉。晴。早發，東風頗逆，午刻過龍游縣，晚泊裘家

堰。

二十九日，戊戌。晴。早發，午過蘭谿縣，小停復行，晚泊香頭。

三十日，己亥。晴。早發，未刻過建德縣，夜行，三鼓過子陵釣臺；自謂深宵過此，真所謂羞見先生者矣。是夜泊鷓鴣原。

十二月

初一日，庚子。晴。早發，東北風頂逆，舟本下水，反負緯而行。已刻過桐廬縣，傍晚泊新店。

初二日，辛丑。晴。子刻行，黎明至富陽縣，晤同年周(名)凱，邀赴其家早餐，午回船。是日東北風甚大，又因次日係大潮之期，舟人恐渡江不穩，堅不肯行，即泊此。

初三日，壬寅。陰。嚴寒。仍泊富陽，入城閒遊。

初四日，癸卯。晴。卯刻行，未刻至杭州閘口。眷屬行李猶在舟中，因須討關，自行入城，至張中丞宅中，爲時已晚，即留宿。

初五日，甲辰。晴。早晨往拜浙中丞高公，面向請給過關免驗之單，晚帶回船。

初六日，乙巳。晴。移行李入杭州城，在客寓中暫住。

初七日，丙午。晴。張二少君，朱、汪二君招遊西湖，赴之，晚回寓。

初八日，丁未。晴。早飯後由寓中乘小船出武林門，至黑橋，登如意船，行至北新關前泊。

初九日，戊申。晴。辰刻過關行，晚泊塘棲。

初十日，己酉。陰。早發，西風頗利，可用偏帆。午雪降。申刻至石門縣泊。

十一日，庚戌。晴。早發，已刻過石門縣，晚泊斗門。

十二日，辛亥。晴。早發，已刻至嘉興府，稍停又行。

十三日，壬子。晴。早發，南風得利。今年天不甚寒，此時尙有

南風，亦殊難得。申刻至姑蘇，糧船甚擠，晚泊胥門口。

十四日，癸丑。微雨。李道新年伯及令弟道穎俱來，其眷屬即移上岸，上午往拜之。

十五日，甲寅。晴。李道穎招午飯，赴之，內子亦往，晚回舟。

十六日，乙卯。晴。上午赴李道新年伯席，即回舟。

十七日，丙辰。由蘇州開舟行。

十八日，丁巳。晴。早發，午過澹墅關，晚至新安鎮泊。

十九日，戊午。晴。早發，北風頂逆，巳刻過無錫，晚泊五□。

二十日，己未。晴。早發，未刻過常州。作啓一封，託常州朱太守轉寄文遠皋師。申刻開行，舟甚擠，晚泊新閘。

二十一日，庚申。晴。早發，北風□，晚至丹陽縣泊。

二十二日，辛酉。陰。早發，午後雪降，至小新豐，舟擠難行，在此暫停。

二十三日，壬戌。晴。早晨束裝赴金陵，□□□□僱小車而行。晴雪初消，泥濘殊甚。午至鎮江府，以□□易騎。戌刻至橋頭宿。

二十四日，癸亥。晴。五鼓行，辰刻龍潭館，申刻入朝陽門，見前朝城闕遺跡，爲之感喟。是晚在督府後觀音菴暫寓。

二十五日，甲子。晴。早晨往拜百菊谿制府，因忌辰未晤。遂至鍾山書院拜見姚姬傳前輩；春秋八十有三，而耳目步履，少年尙或不逮，珊瑚仙骨，留住人間，當代靈光，殆指示數屈矣。又晤陳鑑軒方伯。順往閻偉堂同年處，留晚飯，諱至更餘回寓。是日又拜孫淵如前輩、蔡聽濤、楊□同年，俱未遇。

二十六日，乙丑。晴。早晨拜見菊谿制府，意致甚厚，即促入署居住，因晤汪篋溪同年、黃景韓二尹。是午制府設筵，演劇兩部，梨園更唱迭作，已與襄陽王太守同居正席（王名樹勳，揚州人，尙有幹濟之名）。夜演燈戲，三鼓始徹席。下榻在署中花園。

二十七日，丙寅。晴。陳鑑軒方伯、邱□□[樹棠]太守、姚惜抱前輩、□□□同年俱來拜，未晤。夜，制府復邀觀劇。

二日十八，丁卯。晴。

二十九日，戊辰。子刻雪降，逮晚積至五六寸。署中設席餞臘。夜，制府見過。

癸酉日記

嘉慶十八年，公元一八一三年

正月

初一日，己巳。早起積雪滿庭。與□□□及署中諸公往來賀年。午，菊翁招飲，質谿與焉，談至三鼓始散。

初二日，庚午。晴。代菊谿先生撰摺稿一件。

初三日，辛未。陰。又代撰摺稿一件。是夜，微雪與雨相間而落。署後人家失火。

初四日，壬申。陰。作七古一首，題菊谿先生《平海集》。

初五日，癸酉。陰。爲菊谿先生書扇一柄，爲諸同人書條幅、冊子數事。是日演劇具觴，至夜四鼓始散。

初六日，甲戌。晴。上午出署，詣水西門外登舟，即開行。傍晚頗有西風。夜泊燕子磯，土名觀音前，計行四十里。

初七日，乙亥。陰。早晨風頗利，由大江行，已刻過黃天蕩。午後風色轉東，入儀徵小河行。晚遇頂風，泊舊港。

初八日，丙子。晴。早發，風頗靜，已刻入瓜洲口，至由閘關換坐揚州小船，午後至揚郡，入城，寓埂子街長樂園。

初九日，丁丑。晴。作書一封寄清江。廖運使見訪，未晤；上午往答拜，亦未遇。隨到江都縣署拜張井樓晤譚，並託寄清江信，即回寓。書扇一柄。

初十日，戊寅。晴。書扇兩柄。上午阿厚菴□□□□，即往回拜。

晤譚。又往拜廖復堂運使，留晚飯，延建道李觀察、通州州同克君同在座，二鼓回寓。微有雨雪。

十一日，己卯。雨雪霏微交落，地甚泥濘，未能出門。鹽場林正恆來會晤。上午書聯、箋數事。

十二日，庚辰。晴。往安定書院拜吳穀人前輩，又拜鄒景程（號晴舫）、鮑又增，俱未晤。順往回拜林蕪坡晤譚，午後回寓。書聯、箋數事。

十三日，辛巳。晴。早晨往轅門橋五車樓馮家書肆買書。飯後偕同寓屠蕪州（名春林，淮安人，癸酉選拔）、沈蕩舫、馮勝樓、姚白稜（俱杭州人）、楊熙春（嘉興人），乘小舟同往觀平山堂。晚回至小東門，諸君邀入酒家小飲，侑觴者二人，一曰梅仙，一曰五福。亥刻散席回寓。吳穀人先生來，未遇。

十四日，壬午。晴。早晨清江人來，得書一封，知眷屬于去臘除夜抵袁浦，積日懸懷，于茲少釋，因作一書寄答。書條幅數紙。鄒晴舫來晤譚。

十五日，癸未。晴。早晨往各處賀節辭行，□□□□都轉、鄒晴舫觀察。是晚齏運使□□□□□人來寓。

十六日，甲申。晴。早晨阿齏使來，即往答，未晤。修啓二封與百菊谿、張蘭渚兩先生，又致汪箕谿一書。廖都轉邀翌午音觴，辭之不獲，是日已僱小舟，擬即起行，因此又爲羈滯。

十七日，乙酉。晴。書聯、箋數事。上午赴廖都轉之席，演春臺部，乃揚郡之最著者。吳穀人、谷湖、洪梧生、秦敦復四前輩皆同座。又蔣君（知節）者，心餘先生之嗣，掌廣陵書院講席，亦在座。三鼓徹席回寓。

一八日，丙戌。晴。早晨洪桐生前輩來，邀至梅花書院早飯，巡漕使倪竹泉前輩（琇）、貴觀察（澂）俱在座，適吳穀人前輩亦至，召兩優人侑觴。穀人先生早晨到寓見訪，未晤。鄒晴舫、鮑又增俱來，亦未晤。

午後往拜倪竹泉，順赴安定書院，即回。

十九日，丁亥。晴。早晨倪竹泉前輩來晤譚。巳刻移裝鈔出關門，登小舟，赴清江，適北風甚大，舟行遲緩，戌刻至邵伯驛泊。

二十日，戊子。晴。五鼓開行，未刻至高郵州，□□□□，舟頗難行，戌刻至六安溝泊。

二十一日，己丑。陰。黎明開行，東南風頗順利，辰刻過蒞水。午後至寶應縣，適漕帥阮芸臺先生過此，登舟拜見，交陳恭甫託寄二書，漕帥即來舟中答拜。申刻開行，戌刻泊黃浦。

二十二日，庚寅。陰。四鼓行舟，辰刻至淮安府。入城拜葉次暢明府，留署午飯，邀陶□同年來，上燈後撤席。乘肩輿赴清江浦，亥末刻到文軒大兄署中，閱京中象峯來書。

二十三日，辛卯。晴。

二十四日，壬辰。晴。早晨往拜初頤園先生，未晤。又拜徐晴圃觀察晤譚，即回寓。方銘懷來。

二十五日，癸巳。晴。徐觀察來晤譚。

二十六日，甲午。晴。早晨往拜百菊谿先生晤譚，並晤汪質谿、唐印川諸君，留早飯，即回寓。

二十七日，乙未。晴。書聯、箋數事。初頤園、百菊谿先生俱來，未晤。夜雨。

二十八日，丙申。晴。

二十九日，丁酉。晴。

三十日，戊戌。晴。定議附搭糧艘北上。下午往百菊谿先生處辭行，未晤。夜雨。

二月

初一日，己亥。上半日雨，下半日陰。作家書一封，又寄鄭倬亭、姜蒼雨書各一封。

初二日，庚子。陰。書聯、箋。

初三日，辛丑。晴。晚間徐晴圃觀察遣使來。

初四日，壬寅。晴。早晨常州龔君（朝佐）來。飯後往徐觀察處晤譚，即回。

初五日，癸卯。晴。

初六日，甲辰。晴。汪篋谿作字來，即答之。

初七日，乙巳。晴。下午摺差陳大魁自京回閩到此，將家書交其帶往。

初八日，丙午。晴。祖舫齋大司寇入都過此，赴舟次拜晤，順途回候常州龔君，即回寓。作書一封與象峯，託舫齋先生帶京。

初九日，丁未。晴。夜三鼓忽有雷雨。

初十日，戊申。雨。夜刮大風。

十一日，己酉。晴。

十二日，庚戌。晴。文軒兄往葦蕩營。

十三日，辛亥。晴。

十四日，壬子。晴。書聯箋字仿。聞攔清壩已開。

十五日，癸丑。晴。右眼作疼。

十六日，甲寅。晴。

十七日，乙卯。晴。

十八日，丙辰。晴。聞禦黃壩于是日丑刻開放。上午由寓中攜行李至娘娘廟前登糧船。

十九日，丁巳。晴。早晨乘小船往拜糧幫管運千總蕭琦泰、任懷謨，未晤，即回船。緣前幫糧艘未盡過壩，故本舟仍未開行。

二十日，戊午。晴。糧艘搬米起剝，未刻過禦黃壩，定更後泊楊莊。

二十一日，己未。晴。辰刻行，南風盛發，而河道頗紆，舟向南

行，故反不得風力，午後舟向北駛，遂得風利，晚抵衆興泊。是日計行七十里。

二十二日，庚申。晴。辰刻行，西南風得利，巳刻過□□，未刻過小關關，定更時過宿遷壩泊。是日計行一百二十里。

二十三日，辛酉。陰。早晨微雨。前途糧艘擁擠，本舟緩行。傍晚過朱龍壩，至支河口泊。計行四十里。

二十四日，壬戌。陰。辰刻行，因前途韓莊閘未開，一路水淺，午刻泊舟，離皂河四里。

二十五日，癸亥。陰。北風甚大，仍泊。

二十六日，甲子。晴。

二十七日，乙丑。陰。巳刻微雪即晴。

二十八日，丙寅。晴。

二十九日，丁卯。晴。

三月

初一日，戊辰。晴。

初二日，己巳。陰。制府百菊谿先生過此。

初三日，庚午。晴。

初四日，辛未。晴。上午乘小舟往皂河市上，即回。

初五日，壬申。清明。夜泛小舟玩月。

初六日，癸酉。晴。

初七日，甲戌。密雨竟日。

初八日，乙亥。陰。

初九日，丙子。陰。上午始聞前途開壩，午後開船，舟擠水淺，行不能速，定更後泊皂河，僅行四里。自午後密雨震霖，半夜開霽。前途運閘，僅過□幫糧艘，即復閉閘。

初十日，丁丑。陰。早晨開舟，勉行數里，晚至十里長莊泊。前途

河水仍淺，未能暢行。

十一日，戊寅。晴。未開舟。

十二日，己卯。晴。

十三日，庚辰。晴。

十四日，辛巳。晴。刮大風。

十五日，壬午。晴。午後雨即霽。亥刻利運閘始開，前幫舟先過閘。

十六日，癸未。晴。寅刻開舟，辰刻過利運閘，乍行乍停，晚過窰灣，漏夜行。

十七日，甲申。陰。刮東北大風。辰刻過馬生集閘，午刻至貓兒窩，停舟以俟起剝。

十八日，乙酉。晴。辰刻開舟，僅行數里，水退攔淺，在莊家村起剝。

十九日，丙戌。陰。刮風。起剝甫竣而水落愈甚，不能行駛。亥刻前途新河頭河成閘始開，水長舟行，三鼓過閘行，至達曙。

二十日，丁亥。晴。早晨過灘上集，至大王廟。此處有河定閘未開，停舟靜待，晚至過閘，夜行。

二十一日，戊子。陰。刮風。卯刻過梁王城河清閘。辰刻至黃林莊候收剝船，未開舟，因步往臺莊，即回。

二十二日，己丑。陰。申刻剝船始到，即收剝。酉刻開船，至臺兒莊閘前往。夜雨。

二十三日，庚寅。陰，間有微雨。申刻開閘，行，戌刻至候仙閘前往，僅行十二里。

二十四日，辛卯。陰，微雨。辰刻開閘，行，至頓莊閘前往，僅行八里。

二十五日，壬辰。晴。卯刻開閘，行，又過丁廟閘，午刻至萬年閘

前停舟。酉刻開閘，行，晚至鉅梁橋閘前住。計行二十六里。

二十六日，癸巳。晴。辰刻開閘，行，至石閘前住，申刻過石閘，至新閘前住。計行十二里。

二十七日，甲午。晴。丑刻開閘，行，辰刻至韓莊閘前停舟。未刻開閘，行，風利，戌刻抵彭口閘住。計行七十二里。

二十八日，乙未。晴。因後船攔淺，未經開閘。

二十九日，丙申。晴。辰刻過閘，午刻至夏鎮閘前住。計行十五里。

三十日，丁酉。申刻開閘，行，酉刻過楊家閘，冒雨行，亥刻至常家口住。夜雨頗大。計行二十八里。

四月

初一日，戊戌。陰。早發，辰刻至宋家閘，午後過閘行，東北風頂逆，夜三鼓至邢莊閘前住。計行六十八里。

初二日，己亥。晴。辰刻過閘，至利建閘，午後過利建閘，戌刻過南陽閘，亥刻至棗林閘前住。計行四十二里。

初三日，庚子。晴。五鼓過棗林閘，又過師莊閘。巳刻至仲家淺閘，謁仲夫子廟。未刻過閘，晚過新閘，二鼓至新店閘前住。行三十里。

初四日，辛丑。晴。五鼓過新店閘，巳刻過石佛閘，午刻過趙村閘，申刻至濟寧州在城閘，步入南門城，見太白酒樓，欲登未果。晚回船。大雨一陣，雨後過閘，行一里，至天井閘前泊。計行三十二里。

初五日，壬寅。陰。黎明過天井閘，申刻過虎頭灣通濟閘，亥刻至大長溝，水稍淺，停舟於此。計行五十三里。

初六日，癸卯。晴。寅刻水長舟行，至寺前舖閘，午過閘，晚過南旺柳林閘，又過分水龍王廟，下水又至北旺柳林閘，無板，即過，三鼓抵開河閘前住。計行四十六里。

初七日，甲辰。晴。黎明過開河閘，至袁口閘，申刻過閘，風雨驟

至，兼有冰雹，旋即開霽。亥刻至靳家口閘前住。計行三十里。

初八日，乙巳。晴。寅刻過靳口閘，巳刻至安山閘，午刻過。申刻至戴廟閘，酉刻過。亥刻過張秋，至荆門上閘。計行一百里。

初九日，丙午。晴，刮風。寅刻過荆門上下二閘，巳刻至阿城閘，風勢愈猛。酉刻過阿城上下二閘，夜至七級閘前住。計行三十八里。荆門、阿城、七級，皆有上下二閘，上閘俱係攔水板，舟到即放，下閘則須等候。

初十日，丁未。晴。因後幫船隻擱淺，至酉刻始過七級閘，亥刻至周店閘前。僅行十四里。

十一日，戊申。晴。五鼓過周店閘，辰刻至李海務閘，午過閘，北風大，晚始抵東昌府，泊永通閘前。計行三十二里。

十二日，己酉。五鼓過永通閘，至永通新閘前泊。竟日密雨，聞前閘舟尙未過，故此處亦未啓放。計行二十里。

十三日，庚戌。陰，刮風。寅刻過永通新閘，巳刻至梁鄉閘前住。計行二十一里。

十四日，辛亥。晴。寅刻過梁鄉閘，辰刻至土橋閘前住。晚開閘，北風甚大，行數里即寄棹。僅行十餘里。

十五日，壬子。晴。寅刻行，巳刻至戴灣閘，即過。未刻至臨清州，定更後過臨清磚閘，此處水淺，等候起剝。

十六日，癸丑。晴。海觀察自京赴閩過此，早晨往其坐舟拜晤，即作家書一封，託其帶回。午刻本舟起剝畢，過板閘，晚過黃家淺泊。

十七日，甲寅。晴。黎明行，巳刻至安塔寺收剝，申刻過油坊，定更時過渡口，三鼓離武城縣數里泊。

十八日，乙卯。晴。早晨至武城縣城外，因前舟換剝，在此暫泊。步行入城，觀絃歌書院。未刻開舟，亥刻至甲馬營泊。

十九日，丙辰。晴。早發，午刻至鄭家口暫停，風暴驟起，申刻風

歇，開舟行，戌刻泊三望。

二十日，丁巳。晴。早發，申刻至故城縣，暴風頂逆，勉行數里，定更泊。

二十一日，戊午。晴。四鼓開行。巳刻過娘娘宮，河道極彎，亥刻至德州，近浮橋泊。

二十二日，己未。晴。辰刻過德州浮橋，未刻至百草窪，遣子升赴景州爲陳抑隅送家書。亥刻舟過桑園泊。

二十三日，庚申。晴。早發。巳刻陳抑隅從景州來舟晤談，留早飯，未刻別去。舟過安陵，戌刻至十五里口泊。

二十四日，辛酉。陰。刮大風，舟不得行。

二十五日，壬戌。晴。上半日刮風，午後風定，過連兒窩，晚過戈家墳泊。

二十六日，癸亥。晴。早發，巳刻過東光縣，戌刻至泊頭略停。

二十七日，甲子。晴。子刻開行，辰刻過薛家窩，風頗利。午刻過磚河，酉刻過滄州，夜過朱家陵住。

二十八日，乙丑。晴。五鼓開行，巳刻過興濟，風利。午過青縣，未刻過流河，亥刻至鄧村屯，風色轉逆，遂泊。

二十九日，丙寅。晴。黎明行，巳刻過靜海縣，晚至楊柳青泊。

五月

初一日，丁卯。晴。四鼓開行，卯刻至天津稍停，入城遊玩。午開舟，戌刻泊南倉前，始回船。

初二日，戊辰。陰。舟仍泊。

初三日，己巳。晴。

初四日，庚午。晴。舍舟就陸，早晨在南倉登車，□刻蒲口饘，申刻抵蔡村宿。計行七十里。

初五日，辛未。晴。黎明開車，巳刻河西務饘，酉刻抵張家灣宿。

計行九十五里。

初六日，壬申。晴。五鼓自張家灣起行，卯刻至都城廣渠門，此處行李有稅，需索半日，始得驅車入城。申刻到莆陽會館卸車，與鄭象峯同住。遣人向提塘取信，得接家書六封，張蘭渚中丞書一封。

初七日，癸酉。晴。早晨赴椿樹衙衛軍機處蔡公(名燭)家爲張中丞送信，卽回。作家書一封，覆張中丞一書，由浙江差官寄去。

初八日，甲戌。晴。入內城爲人送信物，并在城外拜客，晚回寓。

初九日，乙亥。晴。入東城爲盛惇圃太守送家書，順赴翰林院庶常館，卽回。是午葉芷汀(中萬)、郭蘭石(尚先)、王蘭谷(道行)、廖儀卿(鴻藻)、鈺夫(金城)、李蘭卿(彥章)，俱來寓敘飲。緣郭蘭石有黔中典試之行，旣住其會館，宜有一餞也。定更後散席。夜雷電交作，旋起大風，竟未得雨，望澤愈殷。

初十日，丙子。晴。聞簡放福建、廣東、廣西三省試差：福建正考官孫汝，山東膠州人，由壬戌庶常散館，改知縣不就，家甚殷實，捐陞員外，本年三月始遷陝西道御史；副考官李德立，山東濟寧州人，己巳檢討。廣東正考官張鑒(浙江人，辛酉，御史)，副考官蘇繹(浙江人，乙丑，編修)。廣西正考官孔傳綸(浙江人，己巳會元)，副考官吳頤(江蘇人，辛酉，戶部主事)。

十一日，丁丑。陰。赴內城拜客，晚回。是日上由圓明園進宮齋戒，爲十四日赴社稷壇禱雨故也。是夜雨降頗大，入土二三寸不等。

十二日，戊寅。早晨微雨，上午晴。送郭蘭石行。

十三日，己卯。晴。客來甚多。下午往福州會館祝關聖誕辰，同鄉諸公俱在。

十四日，庚辰。晴。拜客。是日聖駕至社稷壇步禱。

十五日，辛巳。晴。聞簡放湖南、四川試差：四川正考官廖鴻藻，

副考官萬啓昫(江西人,己巳,中書);湖南正考官瞿昂(順天籍,浙江人,壬戌,左春坊左中允),副考官葉申萬。刻下試差纔放七省,吾閩已有三人;實爲從來未有之盛。今年聖意將前此未經得差者放出,其已曾得差者即不再放。吾鄉與考試差共有八人,楊蓉峯、廖鈺夫皆曾鄉會分房,因此扣留;此外陳漁溪(玉銘)、王蘭谷(道行)、達玉圃(麟,浦城人,禮部主事),皆未曾得差者,日後續放必有可望。是午赴葉、廖兩處稱賀,晚回寓。

十六日,壬午。晴。赴楊同年家祝壽,王同年家行弔。午後至廖宅赴席(同鄉公請洗泥)。

十七日,癸未。晴。下午至黃莘畹侍郎家赴席。

十八日,甲申。晴。寫書信。

十九日,乙酉。晴。聞閩省有摺差來,趕作家書寄回。

二十日。晴。楊蓉峯(惠元)太母壽辰,在宴匯堂演劇,往祝壽,即留觀劇,晚歸(送份金貳兩)。

二十一日。晴。早晨寓中請人早飯。下午赴福州會館公餞葉芷汀、廖儀卿,晚歸。是日上還宮齋戒,爲二十四日夏至方澤大祀故也。

二十二日。晴。致百菊谿制軍書及其署中幕賓各信。

二十三日。晴。致清江浦鄭□□□□□數幅。

二十四日。晴。往城內、城外拜客。鄭松谷太守到京,來寓會晤,帶到張蘭渚中丞、梁芷鄰五兄書。

二十五日。晴。溫清語。是晚起大風,驟雨即止。

二十六日。晴。內城增君(旗人)來,談清文良久。

二十七日。晴。溫清書。午後往謝芝田(凝道,丙辰,進士,吏部郎中,與其子辛未同年)處赴席,同席者,史禮堂(名祐)侍御,江南人,居諫職時多所條陳,奏摺甚工;又祁筠園比部(名賁),山西人,二十四歲即放廣西學政,現因罷議降調。又鄭松谷太守,皆同一席。是午雷雨大作,都城

望雨甚久，得此可慰也。二鼓雨歇回寓。

二十八日。早晨雨，即晴。午後赴廖儀卿處送行，留飯，晚歸。

二十九日。晴。茶葉貢差來，接三月十四日家書一封。上午回拜同鄉、同年諸人。順至曹儷笙師處赴席（名振鏞，戶部尚書，辛未主師），同席者，趙觀察（名麟），杭州人，新授河北道；又王霽九（贈芳）、程雲芬（恩澤）、許萊山（邦光）三同年俱在座。定更後回。

六月

初一日。晴。客來甚多，□□□□□□皆不備載。

初二日。晴。作書覆葉培根明府（申薌），並致陳望坡廉訪，俱託葉芷汀帶往湖南轉寄。午後赴芷汀處送行，留飯，晚歸。

初三日。晴。

初四日。晴。

初五日。晴。作家書一封，致沈雨松先生書一封，俱託貢差帶回。

初六日。晴。同鄉諸君在寓宴集。

初七日。晴。早晨有底姓者來寓，算命起數。其人雙髻，而技甚捷，都下鉅公命造，經其推測，無不悉中，聲名甚盛。是日所算八字多係諛詞，恐難盡信；惟云雙親年壽皆在八旬以外，係據奇門定數推之，甚足喜慰。

初八日。晴。鄭松谷太守新荷簡放湖南常德府，次日謝恩，爲其寫請訓之摺。

初九日。晴。在城外拜客。

初十日。晴。早晨聞簡放浙江、江西、湖北三省試差：浙江正考官汪廷珍（己酉榜眼，現任禮部侍郎，江蘇人），副考于德培（四川人，戊辰，編修）；江西正考官秀寧（禮部侍郎，辛酉科出陳綸石門下），副蔣雲寬（湖南人，刑部員外），湖北正考官陳玉銘（甲子同年），副張轄（河南人，吏部主事）。本年吾閩四人出差，爲從來未有之盛。

十一日。晴。

十二日。晴。

十三日。晴。天氣甚佳：清晨焚香叩頭，齋心默祝。同鄉、同年來者頗多，遂在寓讌集，二鼓以後始散(早齋二席，晚一席)。

十四日。晴。飯後往各處謝壽，晚回。

十五日。晴。致陳望坡廉訪一書，爲黃景韓(盛愈)二尹分發楚北囑爲先容故也。

十六日。晴。內子赴同鄉楊、葉、廖三家拜客。向來同鄉眷屬俱有往來，此番到京後月餘未出，或有先施者，故於是日往拜。

十七日。赴庶常館，同凌、楊二友繙清文，晚回。

十八日。陰。

十九日。晴。新派大教習成果亭(名格，滿洲人，工部侍郎)、陳鍾溪(名希曾，工部侍郎)兩先生莅任(本係秀、汪二位教習，因俱出試差，是以改派)。早晨赴翰林院公行謁師禮，順赴庶常館，晚回。

二十日。上午往東西城回拜客人。

二十一日。陰。午間諸同人來寓公餞陳潼溪(玉銘)。夜微雨。

二十二日。晴。簡放江蘇、陝甘試差：江蘇正考官茹棻(稚葵，甲辰狀元，□□□□□□)，副黃中模(江西人，己巳，編修)；陝甘正史祐(江南人，戶部郎中，丙辰)，副陳何□(山西人，辛□，內閣中書)。

二十三日。晴。

二十四日。陰。同年林弁瀛(元英)由閩中歷楚、豫，到此相晤。知其暫住數日，將學正註銷，改歸本班，即將回閩。下午往回拜。夜雨。

二十五日。晴。鄭象峯掣得山西嵐縣缺。其地在亂山之中，文物聲名俱無所有，乃晉省苦缺，惟出京稍近耳(凡月選官員，每月掣籤俱在二十五日，至下月二十五日領憑起身)。

二十六日。晴。客來甚多。晚間同象峯往葉芷汀家，其夫人抱恙

頗重，爲之商議醫藥。

二十七日。晴。上午往葉芷汀家。午後廖鈺夫、王蘭谷俱來寓，留晚飯。是日上還宮齋戒，爲七月朔日時享太廟故也。

二十八日。晴。早晨送象峯赴午門前驗看，午回寓。天氣酷熱。摺差錢姓來，接張蘭渚中丞六月十二日自杭來書一封，知其復回閩任。是夜三鼓大雨（自到京後，俱不甚熱，早晚更涼，須穿夾馬褂，至是日大熱）。

二十九日。陰。早飯後入西城拜客，并赴初頤園（彭齡）先□□□□弔（其夫人不在），晚回。三鼓後又大雨。

七月

初一日。時享太廟。早晨雨，上下午晴。延建道李觀察升授廣東鹽運司（本日降旨）。又奉諭旨，以范祖禹（宋人）《唐鑑》一書，法戒昭著，飭令文穎館總裁纂修諸臣，倣《唐鑑》之例，將前明一代事務，輯爲《明鑑》，以備幾暇觀覽。是今歲科場策題史學一道，應擬問《唐鑑》及《明史》。

初二日。晴。象峯赴圓明園引見，並無調動。摺差是日起身回閩，家書託其帶回。

初三日，丁卯。陰。早晨至東城宋悅研師家，祝其太師母壽，卽留觀劇，晚歸（宋名鏞，刑部侍郎，江蘇人，係辛未朝考讀卷老師。其太夫人今年九十歲，只似六十餘人，聖旨爲之慶壽）。

初四日，戊辰。晴。

初五日，己巳。晴。多客來。

初六日，庚午。晴。早晨往各處拜客，午回寓。設席延客，黃毅亭太守（名任萬，河南人，辛酉，翰林，新放四川龍安府，係鄭岳丈本房門生）、張霞城明府（名有標，現任直隸三河縣，其尊人名國奎）、林弁瀛、廖鈺夫、鄭象峯俱在座。是日閩省有承差來，接五月二十三日所寄家書一封，沈蔭士、楊雪椒書各一封。

初七日，辛未。晴。大教習成果亭先生在庶常館考課。早晨往謝芝田年伯家(名凝道，汀州人，吏部郎中，其子係辛未同年)，祝其太年伯壽。即赴庶常館應課，課題“綵縷穿七孔鍼賦”(以玉繩湛色金漢垂光爲韻)，詩“賦得舉筆不忘規”(得“規”字，出歐陽修春帖詞中)，繙譯題出司馬溫公《諫院題名記》一篇。申刻回寓。謝芝田處來敦請，又往赴席，二鼓始歸。

初八日，壬申。晴。林弁瀛同年起身回南，往送行，並託寄益母膏。是日簡放山東、山西、河南三省試差：山東正黃鉞(翰林侍讀學士，江南人，庚戌)，副戚人鏡(浙江人，己巳，編修)；山西正吳毓英(辛未榜眼，江蘇人)，副周之琦(己巳，編修，河南人)；河南正蔡之定(癸丑，翰林侍讀學士，浙江人)，副蔣立鏞(辛未狀元，湖北人)。辛未鼎甲三人俱出外差，爲近科所未見之盛，是榜運尙好，亦愈見鼎甲之可貴也。

初九日，癸酉。陰。早晨赴梁九山先生家祝壽，順赴蔣、吳兩同年處賀得差，即回。作家書一封，致元台兄一書，惟貴、對廷、立愛共一書。

初十日，甲戌。陰。上午拜客，傍晚微雨。

十一日，乙亥。晴。寫清書課卷一本。

十二日，丙子。晴。早飯後往同年楊研芬(楊希銓，同習清書)家，祝其年伯壽，即回。此兩日皆考軍機，本日考部員，明日考內閣中書。昨於將考之時，忽有御史傅棠參奏內閣保送人員太多，特旨刪減。先前內閣保送三十二人，李蘭卿(彥章)與焉，今刪去，只剩八人。蘭卿不能與考，甚爲可惜。渠留都三年，專候此席，今既畫餅，八月初當必歸娶矣。

十三日，丁丑。晴。

十四日，戊寅。晴。早晨入西城，巳刻回寓。

十五日，己卯。晴。是日引見，御史、翰林衙門保送十三人，記名者九人，六部衙門保送十七人，記名者十一人，同鄉謝芝田(凝道)與

焉。軍機亦於是日引見考取十八人，記名者十四人。是午福州會館中祭野(館後墳墓)，往行禮，留席，晚回。

十六日，庚辰。晴。早晨接景州署陳名樂一書，即覆之。是晚封家緘，聞次早有差回南，因寄往。又寄山西學使周石芳師一書。

十七日。晴。早晨往曹儷笙師家(名振鏞，戶部尚書，辛未座師)，祝師母壽，即回。

十八日。晴。上午往葉芷汀家，緣其夫人病篤，連日在彼問訊。

十九日。晴。接百菊溪制軍書。

二十日。晴。葉芷汀之夫人去世，往彼照料，定更後始回寓。芷汀出湖南試差，其大世兄又在淮安未及進京，僅有兩少子、一幼女在寓，情甚可憫。

二十一日。晴。上午出門拜客。夜大雨，一陣即止。

二十二日，晴。早晨往翰林院，緣鐵冶亭先生(保)署理掌院學士，於是日莅任，應行參拜。

二十三日。晴。下午同鄉公餞鄭象峯。

二十四日。晴。覆百菊谿制軍書。

二十五日。晴。赴孫公園陳宅觀劇，晚回。

二十六日。晴。李蘭卿、廖鈺夫在寓早飯。

二十七日。晴。爲象峯收行李。

二十八日。晴。早晨送象峯起程赴任。

二十九日。晴。上午回拜數客。

三十日。晴。梁九山先生來，談清文大半日。

八月

初一日。晴。延李蘭卿餞行，渠未獲行，因復請他客。

初二日。晴。

初三日。晴。早晨赴翰林院庶常館丁祭，順途拜客。下午同鄉公

祭葉芷汀之夫人，即在其家晚飯。

初四日。上午雨。接同年陳蒸書，又接名樂書。

初五日。晴。覆名樂書。將軍署貢差來，接劉敬餘、姜蒼雨書。鄭松谷來辭行。

初六日。晴。早晨送松谷行。聞點京兆試總裁及同考官。閩中承差來，接家書一封，日記二紙，對廷、兼三信各一封。順天主考：鄒炳泰(協辦大學士)、盧蔭溥(兵部侍郎，敬廬門生)、果齊斯歡(閣學)。同考官(今年所點試差皆前此未經得差者。八月初間有御史條奏，以現在剩人無多，外間皆可擬得出，故此次分房，新舊兼用)：沈維鏞(辛未本房師)、楊惠元、朱榮、彭浚、吳其彥、董桂敷、何朝彥、陶梁、聞人熙、洪瑩、錢林、那清安、高翔麟、魯垂仲、蘇兆登、孔昭虔、李可蕃、申啓賢。同鄉中書林瑞春點外簾。

初七日。晴。寫家書及親友書共十餘封。晚摺差陳大魁來，接張中丞七月十二日來書一封，即覆之。陳大魁尚須赴熱河遞摺，八九日後方可回南。聞初八早晨另有摺差曹彰出京，是晚封家書，託其帶回。李蘭卿來辭行，云初九日定當起身。

初八日。晴。黎明遣人交信與摺差曹姓，伊已起身，仍將原信攜回。是日作書致李硯雲年伯(鴻瑞)及李仙根(鴻壽)、葉次暢(申謫)，俱託蘭卿帶往。下午王蘭谷招飲，赴之。晚聞蘭卿改于十二日起身。

初九日。陰。上午往蘭卿處，即回。午後微雨。

初十日。晴。早晨聞京兆試題目：首題“才難不其然乎？唐虞之際，於斯爲盛”(與庚午科江南題同)；次“脩道以仁”；三“有大人者，正己而物正者也”；詩“賦得大田多稼”(得“多”字，五言八韻)。近日吏部中爲辦捐復之案，鄒曉屏中堂與初頤園先生意見不合，互相攻擊。上念兩公皆君子，故祇從輕議處。此處首題、三題，蓋有所感而發也。午間督署摺差來，接七月初九日家書一封，對廷、丹林兩妹倩書，內言及李蘭卿之祖仙逝。蘭卿尚未得信。是晚晤見，探其歸意甚決，遂亦不復

明言。

十一日。晴。

十二日。晴。黎明往送李蘭卿行。聞簡放學差之信，因順往梁九山先生家及諸相識處稱賀，即回寓。此次所放吾省文宗汪（名潤之），號雨園，浙江錢塘人，辛酉，翰林，現官左春坊左中允（六品銜，其俸已深，即日可陞監項），曾任雲南學政，乙丑會試分房，林硯樵（慶章）是其門下也。其人品學俱美，係己酉浙江解元。是科主考乃寶東皋先生。首題“君子矜而不爭”二句，元墨甚佳，墨選中多有之。今年放學差，比往年早至半月，大約學政于十月底即可到閩，年內正初開考。與童試者，急宜努力，有司明而且公，勿有負焉可也（學政單另開於後）。

十三日。晴。往城內外各老師處送節儀。下午赴達玉圃（達麟，浦城人，辛酉，翰林，改禮部）之席，晚回。聞京兆試次場題目：《易》“修辭立其誠”二句；《書》“列爵惟五”四句；《詩》“何簋何筮，或負其餽”；《春秋》“公會諸侯于蕭魚”（襄公十有一年）；《禮》“以日星爲紀故事可列也”。是夜天上西北向有火毬。

十四日。接清江浦來書。

十五日。晴。致陳恭甫、馮笏耕兄弟書各一封。午後赴福州會館慶祝奎星誕辰，即留席。夜月色甚亮。

十六日。晴。寫聯對、條幅。下午赴廖鈺夫席。聞京兆試三場題目（經學、農桑、疆域、文體、弭盜）。

十七日。晴。作家書一封，覆張中丞書一封，俱託摺差陳大魁帶回。

學政單：順天吳芳培（安徽人，甲辰，現任閣學），江蘇陳希曾（江西人，癸丑探花，現任工部侍郎），浙江汪廷珍（江蘇人，己酉，現任禮部侍郎），安徽白鎔（順天人，己未，現任右贊善），福建汪潤之（浙江人，辛酉，現任左中允），山東戴聯奎（順天人，江蘇籍，乙未，現任吏部侍郎），山西陳嵩慶（浙江人，辛酉，現任翰林侍講

學士)，陝甘韓鼎晉(四川人，乙卯，現任光祿寺少卿)，廣東彭邦疇(江西人，乙丑，現任侍講)，廣西梁上國(福建人，乙未，現任太僕寺少卿)，湖北朱士彥(江蘇人，壬戌探花，現任詹事府洗馬)，湖南劉彬士(湖北人，辛酉，現任給事中)，貴州李宗昉(江蘇人，壬戌榜眼，現任右贊善)，奉天徐如樹(貴州人，乙未，本順天府丞調)；江西、四川、河南、雲南四省，俱係從前補放，未經考過歲考，例應留任，故不換人。

十八日。晴。

十九日。晴。閱邸抄，知明年停止大挑。

二十日。晴。換戴涼帽。

二十一日。陰。上午陳春溟明府(名池養，興化人，己巳進士，直隸知縣，因審案不口革職)，由保定來京，暫寓館中。是日梁九山先生請酒，未赴。夜雨達旦。

二十二日。大雨竟日。

二十三日。陰。道甚泥濘。白小山先生來談。

二十四日。晴。入城拜客。

二十五日。晴。早晨送陳春溟還保定。同鄉嚴君(芝芳)籤掣浙江宣平縣，往賀之。

二十六日。晴。天氣已寒，可著厚棉。上午赴庶常館，晚回。閩中承差來，接張中丞書一封。

二十七日。晴。

二十八日。晴。鄭涵山明府往京東辦御道，過此晤談，即往回拜。

二十九日。晴。早晨焚香。同年、同鄉諸人來寓讌集，二鼓始散。

九月

初一日。晴。往各處謝壽。

初二日。晴。接鄭象峯自山西來書，知于八月十九日自省赴任，二十五日接印。

初三日。陰，刮風。

初四日。晴。覆鄭象峯書。

初五日。晴。

初六日。晴。

初七日。晴。館中分題作課。繙韓昌黎《師說》一篇。

初八日。晴。寫課卷一本。

初九日。晴。早晨赴楊同年（希銓）家祝壽。夜，京兆試揭曉，同鄉崇安縣安君（名烜，丁卯優貢）獲雋，又有永定縣江姓，現隸順天大宛籍，中第二十名。

初十日。晴。上午赴沈鼎甫師家及楊蓉峯處，候其出闈。晚赴謝芝田年伯之席。

十一日。晴。致鄭文軒、陳名樂、蔣和菴（連江縣）、林裕昭、劉敬餘書各一封，均交承差處。

十二日。陰。上午往同鄉安孝廉處賀捷。

十三日。晴。閱邸抄，知直隸長垣、河南滑縣、山東曹縣有警，溫（承惠）制軍授欽差大臣，帶兵往勦，發糧餉五萬石，章桐門先生（煦，刑部侍郎）署直隸總督。

十四日。晴。往城內外拜客。

十五日。晴。午後有賊匪擅入紫禁城，官兵入禁搜捕，都中內外城門俱行掩閉。夜四鼓，雷大震。

十六日。陰，刮風。

十七日。陰，刮風。

十八日。陰，刮風。聞官兵在近京之宋家莊獲到主使賊匪入禁之盜首林清一犯。